

EKH MEHLYUZIS ROM

Isine akana ekh rom but mihlyuzi. Isine les ohto chhave. Leski romni seko dies roola, hala pes lesa.

– A be, roma! Tu ma dikh te shtes sar averende te dzhas te anes kashta, te keres buki! Te anes e chhavage maro, te keras zumi. Ame merasa, a pale tu sovesa andre!

– Ma ha holya romniye! Amaro kasmety amare pirende ka avel! Hich ma ha holya! Vsichko ka opravindeol!

– A be, roma, ame veche merasa bokhatar!

A chhe, phendyom tuke, romniye! Ma ha holya! Ka avel dies sichko ka opravindeol. Li maro ka ovel, li kashta. Amaro kasmety, amare pirende ka avel.

Avdies-tasya, avdies-tasya, kova semeystvo merel bokhatar. Ay, nish-to veche na achhilo! Vsichko izbikindes, ha le les i nanay kate te soven. Ov pashyola, zasyto. Sar ay rat avel o deel pash leste i phela leske:

– E, roma! A be, dikhava samo soosa! A be, ushti! Le i motika, dzha palal kale kashteste. Merin trin krachkes, chalav trin-shtar drom. Othe isi ekh shiniki frolya. Parvar te chhaven, opraine to semeystvo.

– O, mishto! Mishto!

Dzhangalyovel andivin i leski romni pala:

– Ayde-e-e, mihlyuzina! Kana ka iklyos? Nanay li te dzhas, be?

– Mh...! Ale te phenav tuke savo suno dikhlyom!

– O, hlyav te dades! Hlyav te daya! Tu suno dikhlyan!

– Ale te shunes, chhe!

Dobre, ama lengo komshus avela te mangel chhipeta. Ov shundyas, chi mangela te phukavel lake chhipeta. Achhilo i phendyas peske: „ Achh te shunav o suno, pa togava ka zhav.“

Voyda beshti.

– Phukav be, mihlyuzina!

– A chhe, romniye! Te avel kay pashilem sutem..., alo pash mande o deel parne chhorentsa. Phendys mange: „ E, resel sov! Ushti le i motika! Ake kaka kashteste chalav trin-shtar drom! Isi ekh shiniki frolya! Le len, ta parvar te chhaven! Opravine to semeystvo!“

– Ami ker!

– Ami pala mwrzala man, chha! So te ushtyav akana te kerav!